

मार्निंग डोगरी न्यूज़ बुलेटिन, समें. 09-20 Hrs

<><><><><><>

## Headlines

- प्रधानमंत्री नरेन्द्र मोदी होर अज्ज महाराष्ट्र च 56 ज्हार करोड़ रुपें दी परियोजनाएं दी शुरू आत करगंन ते प्रधानमंत्री किसान स्कीम दी 18 किशत बी जारी करगंन।
- विदेश मंत्री डॉ. एस.जयशंकर होर एससीओ दी बैठक लेई पाकिस्तान जांगन। एह भारती विदेश मंत्री दा पिछले 9 ब'रे च पैह्ला दौरा होग।
- कुपवाड़ा जिले च सुरक्षाबलें धुसपैठ रोधी इक कारवाई दरान अज्ज बडलै दऊं आतंकवादिएं गी मारी मकाया ऐ।
- गृह मंत्रालय नै उमर अब्दुल्ला हुंदे उस दावे गी सिरे थमां खारज करी दित्ता ऐ, जेह्दे च उनें आखेआ हा जे केन्द्र सरकार जम्मू कश्मीर च बनने आली नमीं सरकार ते मुख्मंत्री दी शक्तिएं इख्तेयारें गी घट्ट करने दी कोश्ट करा'रदी ऐ।
- दुबई च खेड्डे गेदे महिलाएं दे टी-20 क्रिकेट विश्वकप दे इक मैच च न्यूजीलैंड नै भारत गी 58 रंजें कन्नै हराया।

<><><><><><>

## PM-Maharashtra

प्रधानमंत्री नरेन्द्र मोदी होर अज्ज महाराष्ट्र दे इक ध्याड़े दे दौरे पर होंगन। अपने दोरे दरान प्रधानमंत्री होर वाशिम च राईबाई ते पशुपालन सेक्टर कन्नै सरबंधत तकरीबन 23 ज्हार करोड़ रुपें दिएं बक्ख-बक्ख पैहलकदमिं गी शुरू करोआंगन। ओह बन्जारा विरासत अजैबघर दा बी उदघाटन करगंन। मगरा ओह ठाणे च 32 ज्हार 800 करोड़ रुपे दिएं बक्ख-बक्ख विकास परियोजनाएं दे नीह पत्थर रक्खगंन ते केइएं दा उदघाटन बी करगंन। वाशिम जिले च मोदी होर प्रधानमंत्री किसान सम्मान निधि योजना दी 18मीं किशत जारी करगंन। इस कार्यक्रम दरान मुख्य भरै दे 9 करोड़ 40 ज्हार करसानें गी 20 ज्हार करोड़ रुपें शा मते दा लाह हासल होग। मोदी होर 1 ज्हार 920 करोड़ रुपें दे कृषि ढांचागत विकास कोष दे तैह्त 7 ज्हार 500 प्रोजेक्ट राष्ट्र गी समर्पित करगंन। मोदी होर मवेशिं लेई संगठित जिनोम चिप बी जारी करगंन। एह्दे अलावा ओह महाराष्ट्र च 19 मैगावाट दी समर्थ आले 5 सोलर पार्क बी राष्ट्र दे नमित लांगन।

ठाणे च प्रधानमंत्री होर महत्वपूर्ण मेट्रो ते शिडक परियोजनाएं दा उद्घाटन ते नीह पत्थर रक्खगंन। ओह बीकेसी थमां आरे जेवीआईआर सेक्शन तगर चलने आली मेट्रो ट्रेन गी बी रवाना करोआंगन।

<><><><><><>

## Jaishankar-Pakistan

विदेश मंत्री डॉ. एस.जयशंकर होर इस म्हीने शंघाई सैहयोग संगठन एससीओ दी बैठक च हिस्सा लैने लेई पाकिस्तान दे दोरे पर जांगन। विदेश मंत्रालय दे प्रवक्ता रणधीर जैसवाल होरें कल एहदी तस्दीक करदे होई आखेआ जे विदेश मंत्री होरें 15 ते 16 अक्टूबर गी पाकिस्तान दी राजधानी इस्लामाबाद च लग्गने आले शंघाई सैहयोग संगठन दे शिखर सम्मेलन च शामिल होने जा'रदे भारतीय शिष्टमंडल दी अगुवाई करगंन। अगस्त च पाकिस्तान नै प्रधानमंत्री नरेन्द्र मोदी होरें गी एससीओ दे बैठका च हिस्सा लैने लेई इस्लामाबाद ओने दा साददा दित्ता हा। डॉ. जयशंकर हुंदे इस दोरे गी मता महत्वपूर्ण मन्नेआ जा'रदा ऐ की जे भारत आस्सेआ लैता गेदा एह इक बड्डा फ़ैसला ऐ। एहदे शा पैहले दिसम्बर 2015 च उस बेले दियां विदेश मंत्री सुषमा स्वराज होर अफगानिस्तान बारे लोआए गेदे इक सम्मेलन च हिस्सा लेने लेई इस्लामाबाद गेइयां हियां। भारत सदा थमां इस गल्लै पर कायम ऐ जे ओह पाकिस्तान कन्नैआम गोआंढिएं आला लेखा खरे दोस्ताना सरबंधें दी मेद रखदा ऐ पर पाकिस्तान गी एहदे लेई आतंकवाद मुक्त ते टकराव मुक्त माहौल तैआर करना लोडचदा। तोआई जाकिर नायक दे पाकिस्तान दौरे बारे पुच्छे गेदे इक सुआले दा परता दिंदे होई जैसवाल होरें आखेआ जे भारतीय बवस्था कोला बचियै फरार होए दे कुसै आदमी दा जेकर पाकिस्तान सुआगत करदा ऐ तां एह कोइ नमीं जां रहान करने आली गल्ल नेई ऐ। उआं उनें इसी इ कमंदे भगें आली गल्ल बी जरूर आखेआ।

<><><><><><>

## Infiltration

उत्तरी कश्मीर दे कुपवाड़ जिले च सुरखा बलें अज्ज बन्ने पारा घुसपैठ दी इक कोशश गी नाकाम बनांदे होई दऊं आतंकवादिएं गी मारी मकाया ऐ। फौज दी इक सोशल मीडिया पोस्ट च चिनार कोर नै आखेआ ऐ जे जिले दे गुगलधार इलाके च दऊं आतंकवादिएं दा सफाया करी दित्ता गेआ ते भारी मात्रा च थेआर ते गोली बरूद बरामद कीता ऐ। खीरी जानकारी थ्होने तगर कारवाई जारी ही ते इलाके गी खंगालेआ जा करदा ऐ।

<><><><><><>

## Amit Shah-Drugs

केन्द्री गृहमन्त्री अमित शाह होरें आखेआ ऐ जे प्रधानमन्त्री नरेन्द्र मोदी हुंदी अगुवाई च पिछले 10एं ब'रें दरान 5 लक्ख 43 ज्हार 6 सौ किलोग्राम शा मता नशे दा समेयान जब्त कीता गोआ ऐ। एह गल्ल उनें कल गांधी नगर च इक सार्वजनिक समारोह दरान आक्खी। शाह होरें एह बी आखेआ जे केन्द्र सरकार दा मकसद साढी युवा पीढ़ी गी बचाने लेई भारत गी नशा मुक्त बनाना ऐ ते सरकार आस्सेआ इस दिशा च जरूरी जतन कीते जा'रदे न।

<><><><><><>

## Pak Protest

पाकिस्तान च जेलबंद साबका प्रधानमन्त्री इमरान खान दे समर्थकें आस्सेआ कड्डी गई सरकार विरोधी रैली गी रोकने लेई कल इस्लामाबाद ते रावलपिंडी च मोबाइल नेटवर्क ते इंटरनेट सेवा बंद करी दित्ती गई। पुलस नै शौहरा गी ओने आले सारे रस्ते बंद करी दित्ते ते कुसै बी थाहर किट्ठ गी मनाई कीती ऐ। इमरान खान होरें अपने समर्थकें गी शांतिपूर्ण विरोध प्रदर्शन करने लेई आखेआ ऐ। इमरान खान दी पार्टी पीटीआई नै पिछले हफते मुल्खें च केई रैलियां कीतियां न, जिंदे च उनें अपनी पार्टी दे संस्थापक गी जेल च बंद करने ते चुनां आयोग आस्सेआ आरक्षित सीटें दे फैसलें गी लागू करने च चिर लाने दा विरोध कीता ऐ।

<><><><><><>

## Prez Ek Ped

राष्ट्रपति द्रौपदी मुर्मू होरें केन्द्र सरकार दे बूहटे-पौधे लाने आला अभियान "एक पेड़ मां के नाम" च शामिल होने दा आह्वान कीता ऐ। कल राजस्थान दे माउंट आबू च "स्वच्छ ते सेहतमंद समाज लेई आध्यत्मिकता" विशे उप्पर वैश्विक शिखर सम्मेलन गी संबोधत करदे होई उनें आखेआ जे लोकें गी ग्लोबल वारमिंग ते पर्यावरण प्रदूषण जनेई हकीकतें दा सामना करना होग ते ओहदे लेई उनें निर्णायक कारवाई करने उप्पर जोर भरेआ।

<><><><><><>

## MHA-Omar

केन्द्री गृह मंत्रालय नै इस गल्लै गी सिरै थमां खारज करी दित्ता ऐ जे जम्मू कश्मीर च तौले गै बनने जा'रदी नमीं सरकार ते मुखमन्त्री दे इख्तेयारें ते शक्तिएं च कओती करने लेई जम्मू कश्मीर दे मुख सचिव गी निर्देश देने दा प्रस्ताव ऐ। मंत्रालय नै आखेआ जे साबका मुखमन्त्री उमर अब्दुल्ला हुंदे आस्सेआ इस बारे जारी बयान च रत्ती भर दी सच्चाई नेई ऐ। उमर अब्दुल्ला होरें अपने सोशल मीडिया प्लैटफार्म पर आखेआ हा जे बीजेपी नै जम्मू कश्मीर च अपनी हार साफ तौरा पर मन्नी लैती दी ऐ नेई ते मुख सचिव होरें गी सरकार दे संचालन नियमें च बदलाव करियै मुखमन्त्री ते नमीं चनोने आले सरकार दिएं शक्तिएं इख्तेयारें च कटोती करियै उसी उपराज्यपाल होरें गी सौंपने दा जिम्मा कीह दित्ता गेदा ऐ। मंत्रालय नै साफ कीता ऐ जे उमर अब्दुल्ला हुंदा एह ब्यान झूठा ते लोकें च भर्म-भेलेखा पैदा करने आला ऐ ते मंत्रालय दा इस चाल्ली दा कोई प्रस्ताव ऐ गै नेई। की जे जम्मू कश्मीर पुर्नगठन कनून 2019 गै अपने असल सरूप च कायम ऐ।

<><><><><><>

## CS-eshram

मुख सचिव अटल डुल्लू होरें ई-श्रम पोर्टल पर दर्ज श्रमकें गी सरकार आस्सेआ शुरू कीती गेदिएं बक्ख-बक्ख स्कीमें दा लाह पजाने बारे तैआर कार्ज योजना दी समीक्षा कीती। मुख सचिव होरें ई-पोर्टल पर दर्ज सारे मजूं श्रमकें दे राशन कार्डें दी स्थिति दा जायजा लेंदे होई आखेआ जे सब्बने योग्य श्रमकें दे राशन कार्ड तौले बनाए जान। मुख सचिव होरें सरबंधत बक्ख-बक्ख मैहकमे दे नामजद सब्बने नोडल अफसरें, जिंदे च समाज कल्याण, सेहत ते स्कूली शिक्षा मैहकमे बी शामिल न, गी आखेआ जे ओह आपूं च नेडमा तालमेल बनाइयै कम्म करन तां जे स्कीमें दा लाह योग्य सब्बने लोकें तगर पुज्जी सकै।

<><><><><><>

## Katra Bus

कल माता वैष्णो देवी तीर्थयात्रिणं गी लेइयै जा'रदी इक बस च अगग लग्गी गई, लेकन सारें यात्रिणं दा बचाह होई गेआ। साढ़े रियासी दे संवाददाता देविन्द्र ठाकुर होरें दस्सेआ जे श्री माता वैष्णो देवी जी दे दर्शन करियै परतोआ 38 तीर्थयात्रिणं गी लेई इक बस च बाडन नाले दे कोल चानचक्क अगग लग्गी गई। डरैवर नै तुरत गड्डी गी रोक़ी दित्ता ते सारें यात्रुणं गी अगग फैलने कोला पैहले गड्डा शा बाहर कड्डी दित्ता। घटना च बस फकोई गई पर यात्रिणं दा बचाह होई गेआ।

<><><><><><>

### 3<sup>rd</sup> Navratra

अज्ज त्रीआ नराता ऐ। अज्जै दे रोज मां दुर्गा दे चन्द्रघंटा रूप दी पूजा अर्चना कीती जंदी ऐ। मां दे इस सरूप च उंदे सरीरै दा रंग सुन्ने आला लेखा सनैहरी ते लिशकना, मत्थे पर घंटे दे अकार दा चन्द्रमा ते ओ शरे पर सवार न। दस बांवां न ते हत्थें च कमल, तीर, कमान, करमंडल, तलवार, त्रिशूल, गुर्ज ते केई अस्त्र शस्त्र न। उंदे गलै च चिट्ठें रंगै दी फुललें दी माला ते सिरै पर मुकअ ऐ जेहदे पर केई रतन-नग जड़े दे न। मानता ऐ जे मां दे चन्द्रघंटा सरूप दी पूजा अर्चना करने नै माहनू दलेर ते हिम्मती बनदा ऐ ते ओहदे जीवन दे सारे डर ते दुख कसाले होई जंदे न।

<><><><><><><>

### Flower Udhampur

मुल्खै दे बाकी हिस्से आला लेखा समूलचे जम्मू प्रांतै च बी नराते दी खूब रौनक ऐ। नराते दे चलदे जित्थें इक बक्खी चौने पाससे भक्तिमयी माहौल दिक्खने गी लब्धै करदा ऐ उत्थें गै केई समाजिक ते धार्मिक सदभाव दे नमूने बी दिखने गी लभदे न। उधमपुर कस्बे च गोल मार्केट इलाके ते मंदरें दे बाहर केई मुसलमान फुल्ल बेचने दा कम्म करदे न जेहड़ा इस गल्लै दा पमाण ऐ ते साढ़े इत्थें बक्ख-बक्ख धर्मै दे आयोजनं गी सफल बनाने च होरने धर्मै दे लोकें दा बी योगदान होंदा ऐ। भाईचारे दे प्रति फुल्ल बेचने आले इनें लोकें पर बी नराते दरान मां दुर्गा दी किरपा बरसदी ऐ जेहदे नै उंदा कम्म कारोबार बद्धे ऐ ते ओ शैल पैहे बट्टी सकदे न। फुल्ल बेचने आले मंजूर हुसैन नै साढ़े उधमपुर जिला संवाददाता अचिन दूबे कन्नै गल्ल करदे होइ आखेआ.....

<><><><><><><>

### Cricket

दुबई च लंदी रातीं खेड्डे गेदे महिला टी-20 क्रिकेट विश्वकप 2024 मकाबले च न्यूजीलैंड नै भारत गी 58 रंजें कन्नै हराई दित्ता। पैहले बल्लेबाजी करदे होई न्यूजीलैंड नै 20एं ओवरें च 4 विकटें दे नुकसान च 160 रंज बनाए। लक्ष्य दी पीछा करदे होई भारतीय टीम 19एं ओवरें च 102 रंजें पर आउट होई गई। न्यूजीलैंड दी खडारन सौफह?ी डिवाइन नै सारे कोला मते 36 गेदें च नाबाद 57 रंज बनाए ते रोसमैरी मेयर नै 4 विकआं हासल कीतियां। इक होर मैच च दक्खन अफ्रीका नै वैस्टइंडीज गी 10एं विकटें कन्नै हराई दित्ता। 119 रंजें दा पिछा करदे होई दक्खन अफ्रीका नै एह लक्ष्य 17.5 ओवरें च बड़े सौक्खे कन्नै हासल करी लैता।

<><><><><><><>